



Avost al Sambuc

Apontaments, cultura e istòria al Centre de Documentacion Val d'Estura

Decò aquesta istaa l'Associacion Espaci Occitan de Draonier presenta un calendrier d'apontaments naissut da la collaboracion emè la Comuna del Sambuc e lo Centre de Documentacion Val d'Estura, per valorizar l'istòria e la lenga locala e donar visibilitat al Centre de Documentacion, qu'emè sias colleccions es una resorça preciosa pas mec per son país, mas per tota la Val d'Estura e lo territòri occitan. Lhi apontaments, tuchi gratis, se passarèn en cò del Centre Documentacion Val d'Estura, Via Umberto Primo 50/A al Sambuc.

Premier rescontre **Venre 9 d'avost a 18 oras** emè l'inauguracion d'la mòstra ***Lhi trobadors en Piemont***, naissua da una recercha realizaa ental 2012 da Rosella Pellerino, Director Scientific d'Espaci Occitan e deventaa exposicion permanenta a Draonier. L'exposicion presenta la produccion poetica en occitan ental Piemont del 1200, quora de famós trobadors arribon en las principalas corts localas: ental Monferrat Raimbaud de Vaqueiras, Peire Vidal e Aimeric de Peguilhan, e ental Piemont meridional, en cò di senhors del Carretto, Bernart de Bondeilhs e Peire de la Mula. Decò un pichòt grop d'aristocrats piemontés pròva a componer en lenga d'òc: entre aquesti Tommaso II de Savòia, Manfredo I Lancia di Busca, e lhi Marqués de Saluces protectors de Peire Guilhem de Luserna e di turinés Nicolet de Turin, Enchantarel e Trufarel. A l'inauguracion seguirè una pichòta conferença d'la curatritz e un aperitiu ofert da la Comuna.

En lhi oraris de dubertura d'lexposicion serè deco possible visitar, al plan dessot, la mòstra permanenta ***Las baias d'la Val d'Estura*** emè una richa documentacion fotografica, vestas e instruments liats a n'aquesta antica tradiccion presenta en tot lo territòri occitan alpin e enca' viva al Sambuc e a Festiona d'Demont. **Las doas mòstras se polerèn visitar gratis fins al 31 d'avost del 2019 venre, sande e diamenja en orari 16.30 – 19.30.**

Jòus 22 d'avost a 21 oras presentacion del libre ***Valle Stura, Guida a una valle di confine: un affascinante mondo tra due mondi*** justa surtit da Più Eventi Edizioni. Un autre titol per la racòlta de guidas de torisme cultural e excursionistic en las valadas de Coni: un instrument novèl, unic e preciós, per descurbir una des mai encharmantas e bigalhaas valadas del Piemont. A la presença de lhi autors, gachant de fotografias, serè propongut un viatge per la valada da la plana al confin, emè particulara atencion per la Comuna del Sambuc e sias caracteristicas artisticas, naturalisticas, istòricas. Serè possible chatar lo libre.

Per finir **Jèus 29 d'avost a 21 oras** apontament emè **Made in oc** de **Rosella Pellerino**. Invencions e personatges occitans: grands noms coma Cézanne o Agnelli, trobaas universalas da la comuna raïtz occitana coma Limousine, margarina e Pastis. Conferença semiseria per grands e pichòts.

Per informacions Comuna del Sambuc, 0171. 96633 - info@comune.sambuco.cn.it - www.comune.sambuco.cn.it, Espaci Occitan - tel. 0171904075 - segreteria@espaci-occitan.org - www.espaci-occitan.org, Fb @museooccitano, Tw @espacioccitan.

Centro di Documentazione
Valle Stura



Unione Montana
Valle Stura



Attività realizzata con il
contributo della

